

HOOFSTUK 3

RUITERS

3. RUITERS

- 3.1 Lidmaatskap en ledenommers
- 3.2 Logboeke
- 3.3 Identifikasie, kleredrag en toerusting van die ruiter
- 3.4 Ouderdom- en gewigskategorieë van ruiters
- 3.5 Buitelandse ruiters en Suid-Afrikaanse ruiters werksaam in die buiteland
- 3.6 Deelname deur SA ruiters in die buiteland
- 3.7 Gedragskode

3.1. LIDMAATSKAP EN LEDENOMMERS

3.1.1 Lidmaatskap. Slegs ruiters wat lede van 'n klub van die UVVSA is mag aan uithouritte deelneem. Lidmaatskap sluit in:

3.1.1.1 Jaarlikse lidmaatskap (kyk ook Hoofstuk 1). Lede kan by klubs van die UVVSA aansluit teen betaling van 'n jaarlikse ledegeld (soos deur die klub bepaal) sowel as die voorgeskrewe affiliasiefooi (soos deur die Raad van die UVVSA bepaal). Lidmaatskap geld vir een uithouritjaar (kyk Hoofstuk 1). Ruiters wat vir 'n jaar aangesluit het mag gedurende daardie jaar aan alle uithouritte wat onder die beskerming van die UVVSA aangebied word deelneem, teen betaling van die inskrywingsgeld soos deur die ritkomitee bepaal en onderhewig aan die vereistes soos neergelê in die reëls en regulasies van die UVVSA.

3.1.1.2 Daglidmaatskap. Persone wat nie lede van die UV v SA is nie, mag aan klubkompetisies deelneem teen die betaling van die daglidmaatskapfooi. Hierdie fooi is gelykstaande aan 10% van die betrokke klub se jaarlikse ledegeld.

3.1.1.2.1 Daglede mag slegs inskryf vir die eerste been van die spesifieke uithourit, teen betaling van die inskrywingsgeld soos deur die ritkomitee bepaal en onderhewig aan die vereistes soos neergelê in die reëls en regulasies van die UVVSA.

3.1.1.2.2 Daar is geen beperking op die aantal ritte waarvoor 'n persoon as daglid mag inskryf nie.

3.1.1.2.3 Om onervare dagruiters te beskerm, kan die Ritmeester:

- Die daglid koppel aan 'n ervare senior ruiter (in beginsel soos kinderruiters), of
- Van 'n "pas-ruiter" gebruik maak. So 'n "pas-ruiter" is 'n ervare senior ruiter wat voor of saam met 'n groep daglede ry en dan 'n konstante pas aangee, om so te verseker dat daglede nie hul perde ooreis nie. Geen daglid mag dan by die "pas-ruiter" verbygaan nie.

- Hierdie besluit berus by die Ritmeester wat by die rit diens doen, en is nie verpligtend is nie.

3.1.1.3 Tydlike lidmaatskap. Kyk Hoofstuk 1.

3.1.2 Bewys van lidmaatskap. Geen bewys van lidmaatskap word deur die UVVSA uitgereik nie. Volopbetaalde lede se name verskyn op die sentrale lededatabasis wat op die UVVSA se webtuiste beskikbaar is.

3.1.2.1 Dit is die verantwoordelikheid van die ritkomitee om, nie langer as twee dae voor die rit, 'n uitdruk van die lededatabasis te bekom en te verseker dat alle ruiters wat vir die rit inskryf se name wel in die databasis verskyn.

3.1.2.2 Wanneer 'n nuwe lid by 'n klub aansluit en affilieer by die UV v SA sal die betrokke lid se besonderhede eers sewe dae nadat die dokumente by die UV v SA kantoor ingedien is, in die databasis verskyn. In effek kan die lid eers dus sewe dae nadat die dokumente ingedien is, as volle lid aan ritte deelneem.

3.1.2.3 In gevalle waar die betrokke ruiter se naam nie in die databasis verskyn nie, maar waar die ruiter wel kan bewys dat die dokumente langer as sewe dae voor die betrokke rit by die UV v SA kantoor ingedien is, moet die ruiter toegelaat word om deel te neem. Sou dit later blyk dat die inligting soos deur die ruiter verstrekk onjuis was, sal die ruiter geen erkenning vir die rit of die kilometers gery kry nie.

3.2 LOGBOEKE

3.2.1 Vir alle ritte moet 'n ruiter (met die uitsondering van daglede) by inskrywing 'n ruiterlogboek inhandig. Na afloop van die rit sal die ruiterlogboek (opgedateer met die resultaat van die betrokke rit) weer aan die ruiter teruggehandig word.

3.2.2 'n Ruiter wat (om watter rede ook al) nie sy logboek kan inhandig nie, maar wel 'n volopbetaalde lid is (kyk 3.1.2), mag met toestemming van die ritmeester toegelaat word om aan die rit deel te neem. Die verantwoordelikheid rus uitsluitlik op die ruiter om te verseker dat sy/haar logboek later opgedateer word. Hierdie kan gedoen word deur die klubsekretaris van die klub waar die ruiter lid is of deur die tydhouer van die eersvolgende rit waar die ruiter aan deelneem, onder voorwaarde dat die ruiter 'n sertifikaat van prestasie kan toon.

3.3 IDENTIFIKASIE, KLEREDRAG EN TOERUSTING VAN DIE RUITER

3.3.1 Ruiternommers. Alle ruiters moet tydens alle ritte 'n ruiternommer (hetsy 'n nommer uitgereik deur die ritkomitee, 'n permanente klubnummer, 'n erenommer, 'n uniespannummer of 'n nasionale spannummer) dra.

3.3.1.1 Dit is die uitsluitlike verantwoordelikheid van elke ruiter om te sorg dat sy/haar ruiternommer te alle tye duidelik sigbaar is.

- 3.3.1.2 Nommers wat aan ruiters wat erekleure (een, twee of drie ster) verwerf het (voorheen springbokke) toegeken is, bly hul eiendom. Hulle mag met hierdie nommers ry op alle voorritte totdat erekleure om een of ander rede van hulle weggeneem sou word.
- 3.3.1.3 Lede van nasionale en uniespanne mag spesiale nasionale of uniespannommers tydens kompetisies dra indien die organiseerders van die betrokke kompetisie dit toelaat (indien dit nie toegelaat word nie, sal spanlede aan hul spandrag uitgeken word).
- 3.3.1.4 Die UV v SA kantoor sal aan alle lede met eerste affiliasie 'n permanente ruiternommer toeken, en ruiters sal met hierdie nommers ry op alle ritte wat onder die vaandel van die UV v SA aangebied word (ruiters wat nommers tuis vergeet het, mag toegelaat word om met 'n ander nommer aan die rit deel te neem, kyk hieronder).
- 3.3.1.4.1 Ruiters moet hul eie nommers laat maak met swart syfers teen 'n geel of neongeel agtergrond.
- Syfers moet minstens 100mm hoog wees, en die swart lyne moet minstens 15mm breed wees.
 - Die geel/neongeel blok waarop die syfers aangebring word moet, vir volwassenes, minstens 300mm breed by 200mm hoog wees, en vir kinders 200mm breed by 150mm hoog.
- 3.3.1.4.2 Die swart en geel nommers kan op 'n beffie, 'n gholf-hemp of 'n baadjie aangebring word. Die kleur van die beffie, hemp of baadjie word bepaal deur die Unie waarby die klub waar die ruiter 'n lid is, ge-affilieer is.
- 3.3.1.5 Ritkomitees moet toesien dat voldoende addisionele ruiterbeffies by elke rit beskikbaar is vir gebruik deur dagruiters en ruiters wat hul permanente nommers by die huis vergeet het.

3.3.2 Netheid van ruiters.

- 3.3.2.1 Ruiters moet onder alle omstandighede netjies en toepaslik geklee gaan. Kleredrag mag nie die beeld van die uithouritsport benadeel nie, en ruiters moet altyd 'n netjiese en sportiewe beeld uitdra. Dit word aanbeveel dat ruiters rybroeke dra; die dra van kortbroeke deur ruiters terwyl hul perdry is nie toelaatbaar nie.
- 3.3.2.2 Dit word aangemoedig dat ruiters en beamptes tydens prysuitdelings klub-, unie-, nasionale- of erekleure dra.
- 3.3.2.3 Die dra van loshangende ooringe en ander juweliersware wat moontlik aan uitrusting of plantegroei langs die roete kan vashaak word ontmoedig.

- 3.3.3 Die dra van 'n harde hoed is verpligtend vir alle ruiters by alle ritte. Harde hoede moet gedra word te alle tye wanneer die ruiter bereide is op die terrein van die rit (insluitend tydens oefening of opwarming). Hierdie geld ook wanneer ander persone (insluitend kinders van enige ouderdom) op die terrein van die rit op perde rondgelei word. Harde hoede moet te alle tye wanneer dit gedra word behoorlik vasgemaak wees.
- 3.3.1 Hierdie harde hoede moet beproefde hoë-spoed sport veiligheidshoede wees.
- 3.3.2 Dit word ten sterkste aanbeveel dat ruiters harde hoede sal aanskaf wat spesifiek vir perderuiters ontwerp is, en wat voldoen aan die Europese standaard (EN1384), die Britse standaard (PAS 015) of die Amerikaanse standaard (ASTM F1163, of ASTM/SEI gesertifiseer).
- 3.3.4 Tydens alle ritte wat gedurende die nag plaasvind moet alle ruiters glinsterstroke voor en agter op die harde hoed, op die saal se agterkant en stiebeuels plak wat minstens 15mm breed x 100 mm lank is
- 3.3.5 Indien platsool hardloopskoene (of enige ander skoene sonder duidelike gedefinieerde hakke) gedra word, is die gebruik van veiligheidstiebeuels verpligtend.
- 3.3.6 Spore, swepe (met die uitsondering van lonseerswepe wat gebruik word wanneer die perd gelonseer word op die terrein van die rit) en sambokke van watter aard ookal word nie toegelaat by uithouritte nie.
- 3.3.7 Die gebruik van peitse word toegelaat by alle ritte onder die reëls van die UV v SA, mits die peits aan die volgende vereistes voldoen:
- Maksimum lengte 75 cm
 - Die punt van die peits moet bestaan uit 'n dubbelleerflap van minstens 1,5 cm breed en hoogstens 7,5cm lank.

Oormatige gebruik van peitse (volgens die oordeel van die Ritmeester) sal tot dissiplinêre stappe lei.

3.4 OUDERDOM EN GEWIGSKATEGORIEË VAN RUITERS

3.4.1 Kinderruiters

- 3.4.1.1 Ruiters neem as kinderruiters aan uithouritte deel vanaf die begin van die uithouritjaar waarin hy/sy tien (10) jaar oud word tot aan die einde van die uithouritjaar waarin hy/sy dertien (13) jaar oud word. Geen gewigsbeperkinge geld in hierdie kategorie nie (m.a.w. daar is geen minimum gewig vir ruiters wat in hierdie kategorie deelneem nie).
- 3.4.1.2 Ruiters onder die ouderdom van tien (10) jaar mag aan klubritte van die Vereniging deelneem maar word gereken as daglede en mag slegs die eerste been van die rit aflê. Alle reëls van toepas-

sing op kinderruiters geld ook vir ruiters onder die ouderdom van tien (10) jaar.

- 3.4.1.3 Kinderruiters kan slegs aan 'n uithourit deelneem indien 'n senior ruiter verantwoordelikheid vir die kind aanvaar. Dit is die verantwoordelikheid van die kind se ouers of voog om te reël vir 'n geskikte senior om die kind te vergesel. Die senior moet die kind te alle tye gedurende die rit vergesel.
- 3.4.1.4 Seniors wat kinders vergesel moet:
- 3.4.1.4.1 Lede van 'n uithouritklub wees.
- 3.4.1.4.2 As ruiters aan die spesifieke uithourit deelneem.
- 3.4.1.5 Ten einde kinderruiters op 'n rit te vergesel moet 'n ruiter agtien (18) jaar of ouer wees.
- 3.4.1.6 Die senior moet bereid wees om die volle duurte van die rit by die kind te bly. Indien die senior eenmaal 'n kind aanvaar het moet hy/sy regdeur die rit, ongeag of dit 'n eendag of 'n veeldagrit is, na hom/haar omsien.
- 3.4.1.7 'n Senior mag 'n maksimum van drie (3) kinders tydens klub en unie ritte en twee (2) kinders tydens nasionale ritte onder sy/haar beskerming neem.
- 3.4.1.8 Beide senior en kinderruiter(s) sal gediskwalifiseer word indien hulle te enige tyd gedurende die rit van mekaar geskei word. Die senior en kind(ers) mag op die baan nooit buite hoorafstand wees nie (die senior moet voortdurend sonder hulpmiddels met die kinders kan kommunikeer).
- 3.4.1.9 'n Kind mag nie gedurende 'n rit na 'n ander senior oorgeplaas word nie, tensy die eerste senior uittree of gediskwalifiseer of die perd ge-elimineer is, of, in die geval van 'n kompetisie onder trapleerreëls, waar die senior besluit om die trapleer te stop nadat sy perd deur die veeartse ondersoek en geskik bevind is.
- 3.4.1.10 Wanneer die senior van mening is dat die kind hom aan wangedrag op die baan skuldig maak, of wanneer die kind nie na die senior se instruksies luister nie, mag die senior (na gesprek met die ritmeester) versoek dat die kind gediskwalifiseer word, waarna die senior dan met die rit mag voortgaan.
- 3.4.1.11 Indien die senior of die kind nie met die rit kan voortgaan nie, geld die volgende prosedures:
- 3.4.1.11.1 Op pad: Indien die senior nie kan voortgaan nie, is dit sy/haar verantwoordelikheid om die kind aan 'n geskikte, verantwoordelike, berede en deelnemende senior te oorhandig wat die kind dan vir die res van

die been moet vergesel. Na voltooiing van die been kan die ouer of voog van die kind dan die kind aan 'n ander senior ruiter (van die ouer of voog se keuse) oorgee. Enige tyd wat so deur die kind verloor word kan nie voor gekompenseer word nie. Die eerste senior (wat die kind op pad oorhandig het) mag daarna nie met die rit voortgaan nie.

Indien die kind nie kan voortgaan nie, is dit die plig van die senior om by die kind te bly totdat hy/sy hom/haar in die sorg van 'n verantwoordelike nie-deelnemende volwassene kan laat (bv. ouer, voog, baanbeampte). Hierdie persoon moet dan reëlings tref om die kind tot by die vorige of eersvolgende ruspunt (watter een ook al die naaste is) te neem en dan by die tydhouer en veeartspaneel rapporteer dat die kind nie voortgaan nie. Enige tyd so deur die senior verloor sal nie voor gekompenseer word nie. Die betrokke kind mag daarna nie met die rit voortgaan nie.

- 3.4.1.11.2 By 'n kontrolepunt. Indien die senior nie kan voortgaan nie (of, in die geval van 'n kompetisie onder trapleerreëls, wanneer die senior besluit om die trapleer te stop nadat die perd deur die veeartse ondersoek en geskik bevind is), mag die ouers of voog van die kind 'n ander ervare senior vra om die kind te vergesel. In so 'n geval geld die kind se oorspronklike wegspringtyd nog. Tyd wat verlore gaan terwyl die kind vir 'n senior wag (hetsy omdat een nie gereedlik beskikbaar is, of omdat die betrokke senior se vertrektyd na die kind se aanvanklike vertrektyd is), kan nie voor gekompenseer word nie. Die senior ruiter wat, by 'n kompetisie onder trapleerreëls, besluit om die trapleer te stop nadat die perd deur die veeartse ondersoek en geskik bevind is, sal steeds krediet kry vir deel van die rit wat voltooi is, en nie gediskwalifiseer word omdat hy die kind(ers) onder hierdie omstandighede oorhandig het nie.

Kinderruiters sal toegelaat word om saam met 'n senior te vertrek wat voor die kind se aanvanklike vertrektyd vertrek, maar slegs indien:

- By ritte onder die "verpligte rustyd" reëls, daar minstens dertig (30) minute verloop het nadat die kinderruiter by die kontrolepunt aangekom het (m.a.w. die perd moes minstens 30 minute gerus het). Die 30 minute sluit die veearts-ondersoek (waar die kind(ers) se perd(e) geskik bevind was om voort te gaan) in.

- By ritte onder die "heksstelsel" reëls, die kind(ers) se perd(e) reeds deur die veeartse geskik bevind is om voort te gaan, en daar minstens dertig (30) minute verloop het nadat die perd(e) deur die veeartse ondersoek was.

Indien 'n kind nie kan voortgaan nie (of, in die geval van 'n kompetisie onder trapleerreëls, besluit om die trapleer te stop nadat die perd deur die veeartse ondersoek en geskik bevind is), mag die senior op sy vasgestelde tyd vertrek, mits die kind onder toesig van ouers, voog of ander verantwoordelike volwassenes gelaat is.

- 3.4.1.12 Kinderruiters mag deelneem aan ritte langer as tagtig (80) kilometer, met die voorbehoud dat die maksimum afstand waarvoor hulle inskryf nie die volgende oorskryf nie:

120km in een dag.

160km oor twee agtereenvolgende dae.

210km oor drie agtereenvolgende dae.

- 3.4.1.13 Deelname van kinderspanne, hetsy op klub, uniale, nasionale of internasionale vlak word nie toegelaat nie.

3.4.2 Juniors en Jong Ruiters

- 3.4.2.1 Ruiters kan in hierdie kategorie deelneem vanaf die begin van die uithouritjaar waarin hy/sy veertien (14) jaar oud word, tot aan die einde van die uithouritjaar waarin hy/sy een-en-twintig (21) jaar oud word. Geen gewigsbeperkinge geld in hierdie kategorie nie (m.a.w. daar is geen minimum gewig vir ruiters wat in hierdie kategorie deelneem nie).

- 3.4.2.1 Junior/Jong Ruiters mag in spanverband op alle vlakke van kompetisie deelneem (kyk hoofstuk 5).

3.4.3 Senior ruiters.

- 3.4.3.1 'n Persoon kan aan hierdie kategorie deelneem vanaf die begin van die uithouritjaar waarin hy/sy agtien (18) jaar oud word.

- 3.4.3.2 Senior ruiters word vir ritte van 80km en langer ook in gewigskategorieë ingedeel.

- 3.4.3.2 Senior ruiters mag in spanverband op alle vlakke van kompetisie deelneem. Waar die situasie dit regverdig, mag organiseerders ook spankompetisies binne gewigsklasse reël (kyk Hoofstuk 5)

- 3.4.4 Ruiters kan, vanaf die begin van die uithouritjaar waarin hulle agtien (18) word tot aan die einde van die uithouritjaar waarin hulle 21 (een-en-twintig) word, self kies

of hul as seniors of as junior/jong ruiters wil deelneem. Hierdie keuse is nie vas nie, en kan van byeenkoms tot byeenkoms wissel.

3.4.4.1 Ruiters moet egter in ag neem dat hulle op die ranglys geplaas sal word volgens die kategorie van deelname; sou hul dus in dieselfde uithouritjaar in verskillende ouderdomskategorieë aan ritte deelneem, sal hul hulself benadeel omdat hul prestasies tussen twee kategorieë verdeel sal word.

3.4.4.2 Slegs prestasie in die seniorkategorie sal oorweeg word wanneer senior spanne gekies word, en slegs prestasie in die junior/jong ruiterkategorie wanneer junior/jong ruiterspanne gekies word.

3.4.5 Veteraanruiters.

3.4.5.1 Ruiters is veteraanruiters vanaf die begin van die uithouritjaar waarin hulle vyftig (50) word. Deelname as veteraanruiters aan ritte is slegs moontlik indien die ritkomitee so 'n kategorie by 'n rit aanbied.

3.4.5.2 Veteraanruiters mag in spanverband op alle vlakke van kompetisie deelneem, en dit staan 'n ritkomitee vry om so 'n kompetisie by 'n rit aan te bied.

3.4.6 Ruiters word verder geklassifiseer as beginners (alle ruiters wat minder as tweehonderd-en-veertig (240) km in amptelike uithouritte voltooi het), en ervare ruiters (wat 240 km of meer voltooi het).

3.4.7 Slegs senior en junior/jong ruiters wat as ervare ruiters geklassifiseer word mag aan 100 mylerritte (in een dag) deelneem.

3.4.8 Gewigskategorieë (senior ruiters) en inweeg van ruiters

3.4.8.1 Gewigsgrense vir die verskillende kategorieë waarin senior ruiters kan deelneem is soos volg:

3.4.8.1.1 Liggewig: Minder as 73 kg.

3.4.8.1.2 Standaardgewig: 73 kg tot onder 95kg.

3.4.8.1.3 Swaargewig: 95 kg en swaarder.

3.4.8.2 Ruiters mag ekstra gewigte dra ten einde vir 'n volgende (hoër) gewigsklas te kwalifiseer. Hierdie gewigte kan in 'n gewigsak, of op enige ander metode soos deur die inweegbeampte goedgekeur, gedra word.

3.4.8.3 Ruiters word ingeweeg:

3.4.8.3.1 In soortgelyke kleredrag as die waarin hulle die rit gaan ry.

- 3.4.8.3.2 Met die saal, saalkleedjie en ander toerusting wat as deel van die saal op die perd gedra sal word.
- 3.4.8.3.3 Sonder die toom en beskermende toerusting wat op die bene van die perd gebruik word (soos bv. aankapstewels of spierpeesstewels).
- 3.4.8.4 Ruiters MOET te alle tye met al die toerusting waarmee ingeweeg is ry, en sal gediskwalifiseer word indien van die toerusting nie gedra word nie.
- 3.4.8.5 Geen gewigsverlies word op die toerusting toegelaat nie. Ruiters mag 'n maksimum van 2% van hul liggaamsmassa verloor tydens 'n rit.
- 3.4.8.6 Alle ruiters (senior, junior en kind) wat vir afstande van 80km of langer inskryf (uitgesonderd trapleerinskrywings), moet geweeg word (hierdie is noodsaaklik vir die bepaling van die Besvoorbereide Perd). Ruiters wat vir afstande korter as 80km en ruiters wat onder die trapleerstelsel inskryf, word nie in gewigsklasse ingedeel nie, en weeg nie in nie.
- 3.4.8.7 Die inweegbeampte kan enige ruiter te eniger tyd tydens 'n rit weeg om seker te maak dat die ruiter voldoen aan die vereistes van die gewigsklas waarvoor ingeskryf was. Ruiters wat nie aan die vereistes voldoen nie (met inagneming van artikel 3.4.8.4) sal gediskwalifiseer word.

3.5 BUITELANDSE RUITERS EN SUID AFRIKAANSE RUITERS WERKSAAM IN DIE BUITELAND

- 3.5.1 Buitelandse ruiters. Buitelandse ruiters mag aan ritte wat onder die reëls van die UVVSA aangebied word deelneem.
 - 3.5.1.1 Buitelandse ruiters moet:
 - 3.5.1.1.1 'n Toestemmingsbrief van die betrokke land se nasionale federasie kan toon.
 - 3.5.1.1.2 Vooraf by die Algemene Bestuurder aansoek doen om toestemming om aan UVVSA ritte deel te neem. Geen fooi is betaalbaar nie.
 - 3.5.1.2 Die Algemene Bestuurder moet skriftelik toestemming uitreik. Wanneer toestemming uitgereik is, kan sulke ruiters aan alle ritte wat plaasvind tydens die periode van hul besoek aan Suid Afrika, deelneem.
 - 3.5.1.3 Buitelandse ruiters wat nie lede van die nasionale federasie in hul land van herkoms is nie, kan as tydelike lede affilieer (kyk Hoofstuk 1).

- 3.5.1.4 Buitelandse ruiters hoef nie te kwalifiseer om aan die Fauresmith 200 rit deel te neem nie, tensy hulle vir 'n aaneenlopende periode van langer as ses maande in Suid Afrika woonagtig was. Die perd waarop hy/sy inskryf moet egter aan die kwalifiseringsvereistes voldoen.

3.5.2 Suid Afrikaanse burgers wat voltyds in die buiteland werk.

- 3.5.2.1 Suid Afrikaners wat voltyds in die buiteland werk kan steeds as volle lede by UV v SA affilieer.
- 3.5.2.2 Indien hulle geaffilieer is by die nasionale federasie van die land waar hulle werksaam is, geld artikel 3.5.1.1 hierbo.
- 3.5.2.3 As alternatief kan sulke persone as tydelike lede (kyk Hoofstuk 1) affilieer (asof hulle buitelandse besoekers is), mits die persoon skriftelike bewys kan toon (bv. 'n werkspermit, of 'n skrywe van die werkgewer) dat hul voltyds in die buiteland werksaam is.
- 3.5.2.4 Hierdie persone hoef nie te kwalifiseer om aan die Fauresmith 200 deel te neem nie. Vir doeleindes hiervan word “voltyds” gedefinieer as 'n lid wat gedurende die kwalifiseringsperiode vir die betrokke Fauresmith 200 vir minstens ses maande in die buiteland werksaam was. Die perd waarop hy/sy inskryf moet egter aan die kwalifiseringsvereistes voldoen.

3.6 DEELNAME DEUR SA RUITERS IN DIE BUITELAND

- 3.6.1 Lede van die UVvSA wat in die buiteland aan uithouritte wat onder die reëls van die Federation Equestre Internationale (FEI) aangebied word wil deelneem moet vooraf as ruiters by die FEI registreer en vooraf 'n toestemmingsbrief sowel as 'n internasionale ruiterslisensie bekom (al hierdie word deur die UV v SA kantoor hanteer). Ruiters moet via die UVvSA kantoor en SANEF vir FEI ritte in die buiteland inskryf.
- 3.6.2 Lede van die UVvSA wat in die buiteland aan ander uithouritte (nie onder die reëls van die FEI) wil deelneem moet vooraf 'n toestemmingsbrief bekom (hierdie word ook via die UV v SA kantoor gedoen).

3.7 GEDRAGSKODE

- 3.7.1 Hierdie gedragskode is van toepassing op alle lede van die UVVSA, sowel as beamptes, helpers en besoekers wat by 'n ritbyeenkoms teenwoordig is (hierna genoem “lede”):
- 3.7.1.1 Lede moet nie net hul eie regte en verantwoordelikhede erken en respekteer nie, maar ook die regte, veiligheid en menswaardigheid van alle ander lede, beamptes, ritkomitees, bestuurslede en lede van die publiek, sowel as die welsyn van die perde ten alle tye in ag neem.

- 3.7.1.2 Lede moet hulself so gedra dat hul optrede nooit die beeld van die uithouritsport skade sal berokken nie.
- 3.7.1.3 Lede moet ten alle tye hou by die Grondwet en Reëls van die UVVSA.
- 3.7.1.4 Geen lid mag aan 'n rit deelneem terwyl hy/sy onder die invloed van alkohol of 'n verbode middel (soos uiteengesit in toepaslike dokumentasie van die Federation Equestre Internationale) is nie.
- 3.7.1.5 Lede sal alle privaat eiendom (insluitend ablusies en ander fasiliteite op die ritterrein) respekteer en hulself weerhou van enige optrede wat tot die skade van sulke eiendom kan lei.
- 3.7.1.6 Lede sal altyd toesien dat die terrein (insluitende die roete/baan) waar die rit aangebied word ten alle tye skoon gehou word, en sal toesien dat geen rommel gestrooi word nie.
- 3.7.1.7 Rook terwyl die perd gery, gelei of by 'n veeartskontrolepunt aangebied word, sal as slegte ruiterskap beskou word. Rook op die baan is streng verbode en sal tot diskwalifikasie lei.
- 3.7.1.8 Troeteldiere sal ten alle tye onder beheer gehou word. Geen troeteldiere word in die veeartsondersoekarea toegelaat nie.